

Da pievels, reginavels ed elements

Vernissascha digl'emprems cudisch da fantasy en romontsch sursilvan

■ (anr/gv) Tuns magics da Selina Derungs han accumpignau il text da fantasia dallas duas scribentas Flurina Albin e Stina Hendry. In bi diember d'interessents, amitgs e parents ha visitau la sonda la vernissascha dil cudisch «Emalio». La historia fantastica dallas duas scribentas da 13 onns para buca mo da plascher als affons, mobein era a carschi. La «fantasia» prosperescha en fuorma da cudischs, films e giugs cun historias fantasy. La gliesta da «bestseller» ei plena da tals tetels. Ella gliesta da «bestseller» romontscha vegn da raschun il roman da fantasy dallas duas scribentas lumnezianas a surpender igl'emprems plaz.

Da giuvnas per giuvenils

L'entschatta 2013 ha la scolasta secundara Carin Cadruvi da Ruschein fatg attent la menadra dalla Chasa Editura Rumantscha dallas duas scolaras che scrivien plein gust ina historia da fantasy. Enstagl da 30 paginas pretendidas per in project da scola hagen ellas scret 142 paginas. Anita Capaul, la menadra dalla Chasa Editura Rumantscha, ha suttamess la historia alla cumissiun da program e la fantasia da Stina e Flurina ha perschuadiu. Cugl accumpignament da lectorat da Carin Cadruvi ei il manuscret carschius ad in cudisch da 360 paginas.

Da pievels, reginavels ed elements

Il retg stgir smanatscha e conquista cun sia armada da dragants adina dapli regiuns e pievels. Era ils uldauns vegnan catschai pli e pli a cantun. La suletta pusseivladad da cumbatter il nausch ei da s'unir cun auters pievels e sperar silla forza dils elements. Il destin tarmetta il giuven uldaun Emalio sin viadi tier ils cen-



Ils affons han gust da leger «Emalio». Quei fan els allura gest en preschientscha dallas duas auturas Flurina Albin e Stina Hendry (d'avos da dretg).

FOTO G. VENZIN

taurs. Sin quei viadi vegn tut auter che planisau.

Anita Capaul: «Las duas scribentas han creau ina historia plein tensiun ed entretschau quella cun pievels ed elements da fantasy.» Era ella ha seschau inspirar dalla fantasia dallas duas buobas. Il cudisch ei numnadamein concep-

sco cudisch classic da fantasy, cun in maletg da cuviarta plein fantasia e cun scartira glischonta.

www.emalio.ch

Ils lecturs dad «Emalio» han la pusseivladad da commentar il cudisch. Per l'emprema ga ha la Chasa Editura

Rumantscha endrizzau ina plattafuorma per udir il resun dils lecturs. Emalio ei era sin «facebook». Plinavon ha la scolasta Carin Cadruvi elaborau pil mied d'instrucziun «Access» ina lecziun didactica. «Aschia ei quei cudisch lectura era per las scolas», resumescha Anita Capaul.

«In product dallas scribentas»

La scolasta Carin Cadruvi ha accumpignau il project «Emalio»

CUN CARIN CADRUVI
HA GIUSEP VENZIN / ANR DISCURRIU

■ A caschun dalla presentaziun dil cudisch «Emalio» da Stina Hendry e Flurina Casanova ha Anita Capaul menziunau la scolasta Carin Cadruvi da Ruschein la scuvrida dil talent dallas duas scolaras da 13 onns. La dunna da Ruschein ha era accumpignau las duas buobas plein fantasia tier lur ovra captivonta e persequitau lur svilup tochen tier il product final.

Avon treis onns haveis Vos descuvretg il talent da duas buobas scribentas. En tgei rom ei quei succediu?

Carin Cadruvi: El rom romontsch hai jeu legiu ina lectura cull'emprema secundara che ha buca propi plaschiu als scolaras. Ei dat memia pauc lectura romontscha adattada per ils scolaras da quella vegliadetgna. En scadin cass han els giu il sentiment

ch'els vegnessen da scriver meglier. Ord nosa discussiun ei lu naschiu l'idea da scriver sez in cudischet. Ils scolaras ein stai fiug e flomma. Nus vein fatg quater gruppas, els han eligiu il tema e lu entschiet a scriver. Il resultat ei stau quater cudischets che nus vein lu legiu e discussiunau en classa.

Tgei ei stada l'emprema impressiun dall'ovra da Flurina e Stina?

A mi han tut ils quater cudischets dils scolaras plaschiu. Senza problems han els anflau lur temas ed ein vegni da scriver historias interessantas. Flurina e Stina han scret bia dapli che quei che nus vevan fatg giu ed eran aunc adina buc alla fin. Ei fuss stau donn da buca cuntinuar cun quella biala historia. In di hai jeu telefonau alla menadra dalla Chasa Editura Rumantscha, Anita Capaul, ed hai detg che jeu havessi ina proposta per in cudisch da duas scolaras. Ella ei

stada fetg interessada ed ha supplicau da tarmetter il manuscret.

Co haveis Vos accumpignau las duas scribentas. Con ei il cudisch vies product?

Las scribentas han scret lur cudisch tut persulas. Gl'emprems en scola, lu, cu la Chasa editura ha giu dau glisch verda, a casa. Jeu hai surpriu il lectorat e correctorat. Jeu sun adina puspei sesmarvegliada dalla fantasia da Flurina e Stina, co ellas han inventau las figuras, lur characters, acziuns e sentiments – temas, plaschers, cumbats, success e terradas. Ins vesa era il svilup che la persuna principala, Emalio, fa el decuors dalla historia. El ei in herox simpatic che ha era fleivlezias, mo in bien cor. El dat buca si ed accepta siu destin.

Las buobas han fatg d'ina historia cuorta in roman da 360 paginas. Tgei svilup han las duas scribentas fatg enten scriver il roman?

Flurina e Stina han entschiet a scriver il cudisch ell'emprema secundara, uss ein ellas ord scola. Quei ei in temps ch'in carstgaun giuven fa in grond svilup. A mi para ch'ins senta quei era vid il cudisch. Buca mo la figura principala Emalio ha fatg in svilup, mobein era las scribentas.

Ina tala ovra romontscha per giuvenils hai aunc mai dau. Tgei munta quei pil lungatg romontsch e pils affons romontschs?

Jeu sperel ch'els affons e giuvenils legien bugen il cudisch Emalio. E miu giavisch fuss ch'ei dess dapli cudischs per affons e giuvenils. Igl ei impurtant d'haver avunda e bunas lecturas.

Dus onns e miez ha il project cuzau. Co ei Vies sentiment vesend las plunas da cudischs sin meisa?

Quei ei in grondius sentiment.

VAL

Previu in bi gudogn

(anr/gv) Alla radunonza communal dil venderdis sera han ils vischins da Val approbau il preventiv 2016. Quel preveda tier deducziuns da 768 000 francs in gudogn da 685 000 francs. Il pei da taglia duei restar tier 100% dalla taglia cantunala vertenta.

La radunonza ha plinavon approbau il rapport dil niev model da contabilitad (HRM2). Quei model ei vegnius introducius culla integraziun dil quen dall'antieriura vischnaunca S. Martin.

Per ina nova fermada digl'auto da posta a S. Martin ha la radunonza communal approbau in credit da 110 000 francs. Quella fermada vegn realisada en connex culla sanaziun dalla via cantunala. Il cantun paga 30% dils cuosts dalla fermada.

Per la meglieraziun da Val ha la radunonza approbau in credit supplementar dad 800 000 francs. Tenor la nova calculaziun cuosta la meglieraziun total 21,7 milliuns francs. Quei ein rodund 5,7 milliuns dapli che previu. Ils cuosts supplementars ha la carischia effectua, denton era projects supplementars. Il cantun e la confederaziun han gia approbau lur cumpart als cuosts supplementars.

Culla medema caschun han ils vischins da Val approbau in contract da concessiun culla interpresa Truffer SA per l'explozaziun da crappa ella cava «Schmitteli». Las premissas da planisaziun pil diever dalla cava ha la vischnaunca approbau a caschun d'ina votaziun all'urna ils 8 da mars vargau.

Da Lumbrein anora

■ (anr/gv) La firma Altaventa giavisch la furniziun dall'energia producida dallas 20 rodas da vent piazzadas ella regiun denter la Lumnezia e Sursaisa da Lumbrein anora. Quei succedess allura cull'Ovra electrica Lumbrein ensemen cun Repower e sminuess la lingia da tensiun aulta da diesch sin 3,5 kilometers. Sco il Radio Romontsch rapporta ha Andi Imfeld presentau l'idea. El ei igl iniziand dil Parc da vent Surselva. Gian Derungs, il president dall'ovra e responsabel per la strategia e finanzas, beneventa quella idea. Ina migliur dalla reit fussi d'engrau per la Lumnezia, conceda el. Tenor Andi Imfeld vegness la reit finanziada entras Swissgrid.

Culla fusiun da Castrisch cun Glion ei la vischnaunca dad Ilanz/Glion integrada el project. L'Alp Cavel ch'ei tenor las mesiraziuns il liug il pli attractiv per construir las rodas da vent ei bein sin territori dalla vischnaunca Lumnezia, denton en possess dalla vischnaunca Ilanz/Glion. Sco Aurelio Casanova ha detg a RR vegn la vischnaunca buc activa en causa.

Aunc buc enconuscent ei tgi che finanziescha la realisaziun dil Parc da vent Surselva. Las ovras electricas nazionalas cun plans da realisar parcs da vent el Grischun ein seretratgas, aschia era l'Ovra electrica Turitg, dil project Parc da vent Surselva. Sco Andi Imfeld ha sincerau pliras ga ei igl interess pil project en Surselva gronds. Nums d'investurs ha el buca numnau.

RECLAMA

Sonntagsverkauf

13. und 20. Dezember 2015, 11/12–17 Uhr

75 shops · 1800 P · mels/sargans



pizolpark

Pfister

pizolcenter

BAUHAUS

www.pizol-shopping.ch

pizol-shopping